

UDHËZIM
Nr.1245, datë 15.8.2007

**PËR PROCEDURAT E HARTIMIT TË LISTAVE TË ZGJEDHËSVE PËR ZGJEDHJET E
PJESSHME PËR NË KUVENDIN E SHQIPËRISË NË ZONËN ZGJEDHORE NR.31**

Në zbatim të nenit 102 pika 4 të Kushtetutës së Republikës së Shqipërisë, të dekretit të Presidentit të Republikës nr.5453, datë 13.8.2007 "Për caktimin e datës së zgjedhjeve të pjesshme për në Kuvendin e Shqipërisë në zonën zgjedhore nr.31", të nenit 60/1 të ligjit nr.9087, datë 19.6.2003 "Kodi Zgjedhor i Republikës së Shqipërisë", i ndryshuar,

UDHËZOJ:

1. Zyra e gjendjes civile në njësinë bashkiake nr.9, Tiranë, ku do të kryhen zgjedhjet e pjesshme për në Kuvendin e Shqipërisë, pas marrjes së listës përfundimtare të zgjedhjeve të datës 18 shkurt 2007, nga Drejtoria e Përgjithshme e Gjendjes Civile, të kryejë përditësimin e listave të zgjedhësve, për zgjedhjet e datës 23 shtator 2007, jo më vonë se data 25 gusht 2007, sipas përcaktimeve të nenit 55 të ligjit nr.9087, datë 19.6.2003 "Kodi Zgjedhor i Republikës së Shqipërisë", i ndryshuar, bazuar në të dhënat e regjistrave themeltarë me vendbanim të kësaj njësie.

2. Kryetari i njësisë bashkiake nr.9, pasi merr listën e zgjedhësve nga zyra e gjendjes civile, brenda datës 26 gusht dërgon listat e zgjedhësve të përditësuara në letër dhe një kopje e tyre në format elektronik, në Drejtorinë e Përgjithshme të Gjendjes Civile.

3. Drejtoria e Përgjithshme e Gjendjes Civile brenda 24 orëve nga marrja e listave të përditësuara i dërgon njësisë përkatëse të qeverisjes vendore listën e dublimeve të dyshuara brenda vetë njësisë së qeverisjes vendore dhe ato me njësi të ndryshme të kësaj zone zgjedhore.

Për dublimet brenda së njëjtës njësi të qeverisjes vendore, Drejtoria e Përgjithshme e Gjendjes Civile i kërkon kryetarit të njësisë bashkiake nr.9, heqjen e zgjedhësit nga lista e zgjedhësve për shkak të ndodhjes më shumë se një herë në listën e zgjedhësve.

4. Kryetari i njësisë bashkiake nr.9, pasi ka marrë vendim për heqjen nga lista e zgjedhësve të zgjedhësve të regjistruar më shumë se një herë, miraton listën përfundimtare të zgjedhësve për zgjedhjet e pjesshme të datës 23 shtator 2007, jo më vonë se data 28 gusht 2007.

5. Pas miratimit nga kryetari i njësisë bashkiake nr.9, lista përfundimtare e zgjedhësve i dërgohet KZZ-së me datë 28 gusht 2007, të printuara në tri formate, sipas përcaktimeve të nenit 59 të Kodit Zgjedhor:

- Listë zgjedhësish e ndarë sipas qendrave të votimit për t'u shpallur pranë çdo qendre votimi. Një kopje e kësaj liste dhe në format elektronik i dërgohet DPGJC-së brenda 24 orësh;

- Listë zgjedhësish në nivel të njësisë së qeverisjes vendore që mbahet nga KZZ-ja për informimin e zgjedhësve, e renditur sipas rendit alfabetik të mbiemrit të zgjedhësve;

- Listë zgjedhësish e ndarë sipas qendrave të votimit, e cila i dorëzohet KZZ-së për t'u përdorur nga KQV-ja ditën e votimit. Kjo listë duhet të përmbajë për çdo zgjedhës edhe emërtimin, numrin dhe faqen e regjistrimit themeltar me vendbanim të gjendjes civile të njësisë përkatëse.

6. Brenda 24 orëve nga marrja e listave përfundimtare, KZZ-ja i shpall ato pranë qendrave përkatëse të votimit në një vend me hyrje të lirë.

7. Kryetari i njësisë bashkiake nr.9, pas miratimit të listës përfundimtare të zgjedhësve, jo më vonë se data 13 shtator 2007, kryen njoftimin me shkrim për çdo zgjedhës të përfshirë në listat përfundimtare, me anë të grupeve dyshe të punës të ngritura për çdo qendër votimi, sipas kësaj procedure:

- Njoftimi me shkrim i zgjedhësve kryhet nga grupet dyshe të punës, të formuara nga një përfaqësues i administratës së bashkisë dhe një përfaqësues i caktuar nga partia më e madhe në opozitë me kryetarin e njësisë bashkiake nr.9;

- Jo më vonë se data 30 gusht 2007 kryetari i njësisë bashkiake nr.9 i kërkon partisë më të madhe opozitare në NJQV-në e tij të caktojë personat që do të marrin pjesë në grupet dyshe të punës

për çdo QV. Jo më vonë se data 1 shtator 2007 partia duhet të ketë dorëzuar listën e personave që do të marrin pjesë në grupet dyshe të punës;

- Me vendim brenda datës 3 shtator 2007 kryetari i njësisë bashkiake nr.9, bën caktimin e grupeve dyshe të punës për njoftimin e zgjedhësve për çdo qendër votimi. Njoftimi mund të kryhet edhe vetëm nga përfaqësuesi i administratës së NJQV-së nëse partia politike nuk respekton afatet e caktuara në këtë udhëzim, kur ajo është njoftuar me shkrim nga kryetari;

- Zyrat e gjendjes civile vënë në dispozicion të çdo grupi njoftimi, brenda datës 3 shtator, njoftimet përkatëse dhe listën përfundimtare të zgjedhësve të QV-së përkatëse;

- Grupet e punës kryejnë njoftimin për çdo familje që ndodhet në listën përfundimtare të zgjedhësve të qendrës së votimit brenda datës 13 shtator 2007. Kryefamiljari ose një person madhor i familjes firmos në listën e zgjedhësve kur merr njoftimin.

8. Ndryshimet në lista pas shpalljes së listës përfundimtare bëhen në përputhje me nenin 60 të ligjit nr.9087, datë 19.6.2003 “Kodi Zgjedhor i Republikës së Shqipërisë”, i ndryshuar.

9. Kryetari i njësisë bashkiake nr.9, vë në dispozicion të subjekteve zgjedhore të regjistruara në KQZ kopje të listës përfundimtare të zgjedhësve, jo më vonë se tre ditë nga data e paraqitjes së kërkesës dhe pa pagesë.

10. Drejtoria e Përgjithshme e Gjendjes Civile vë në dispozicion të subjekteve zgjedhore të regjistruara në KQZ kopje të listës përfundimtare të zgjedhësve për zonën zgjedhore, jo më vonë se tre ditë nga data e paraqitjes së kërkesës dhe pa pagesë.

11. Ky udhëzim hyn në fuqi menjëherë.

MINISTRI I BRENDSHËM

Bujar Nishani